

**VENDIM**  
**Nr. 156, datë 30.6.2021**

**MBI SHQYRTIMIN E KËRKESËS SË FTL SHA PËR SHTYRJEN E HYRJES NË  
FUQI TË VENDIMIT TË BORDIT TË ERE-s NR. 202, DATË 2.12.2020, PËR  
MIRATIMIN E “RREGULLORES PËR PROCEDURAT E SHITJES SË TEPRICAVE  
TË ENERGJISË ELEKTRIKE NË TREGUN E PARREGULLUAR PËR SHOQËRINË  
PUBLIKE TË FURNIZIMIT”**

Në mbështetje të neneve 16 dhe 19, të ligjit nr. 43/2015, “Për sektorin e energjisë elektrike”, të ndryshuar; të nenit 104, pika 3, të ligjit nr. 44/2015, “Kodi i Procedurave Administrative i Republikës së Shqipërisë”; të nenit 11, pikat 2 dhe 3, të vendimit të Këshillit të Ministrave (VKM) nr. 244, datë 30.3.2016, “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”, të ndryshuar, dhe të nenit 15, të “Rregullores për organizimin, funksionimin dhe procedurat e ERE-s”, miratuar me vendimin e Bordit të Entit Rregullator të Energjisë (ERE) nr. 96, datë 17.6.2016; Bordi i ERE-s, në mbledhjen e tij të datës 30.6.2021, mbasi shqyrtoi relacionin nr. 96/6 prot., datë 28.6.2021, të Drejtorive Teknike,

konstatoi se:

- Bordi i ERE-s, me vendimin nr. 202, datë 2.12.2020, vendosi miratimin e “Rregullores për procedurat e shitjes së tepricave të energjisë elektrike në tregun e parregulluar për shoqërinë publike të furnizimit”.

- Në vijim, Bordi i ERE-s, përmes vendimeve nr. 37, datë 11.2.2021 dhe nr. 101, datë 16.4.2021, ka vendosur shtyrjen e hyrjes në fuqi të vendimit nr. 202, datë 2.12.2020, sipërcituar.

- Shoqëria Furnizuesi i Tregut të Lirë (FTL sh.a.), nëpërmjet shkresës nr. 320/7 prot., datë 28.5.2021, me lëndë: “Vijim komunikimi mbi hyrjen në fuqi të ‘Rregullores për procedurat e shitjes së tepricave të energjisë elektrike në tregun e parregulluar’”, ka kërkuar mirëkuptimin e ERE-s për shtyrjen e hyrjes në fuqi të kësaj rregulloreje deri në implementimin e platformës IT *online* të shitjes së energjisë elektrike.

- Nisur nga fakti që kërkesa e FTL sh.a. nuk përcaktonte një afat të saktë për periudhën në të cilën kërkohej shtyrja e hyrjes në fuqi të vendimit të Bordit të ERE-s nr. 202, datë 2.12.2020, ERE, nëpërmjet shkresës nr. 104/9 prot., datë 10.6.2021, kërkoi nga FTL sh.a. të bënte saktësimet përkatëse.

- Në përgjigje të sa kërkuar nga ana e ERE-s, FTL sh.a., përmes shkresës nr. 1829/1 prot., datë 21.6.2021, ka bërë me dije se: “Për sa i përket ndryshimeve/zhvillimeve në platformën IT *online* të shitjes së energjisë elektrike, aktualisht procedura e prokurimit publik është në fazën e vlerësimit të ofertave të operatorëve ekonomikë pjesëmarrës. Implementimi i platformës IT *online* të shitjes së energjisë elektrike, do të realizohet në një afat 65 (gjashtëdhjetë e pesë) ditë nga data e lidhjes së kontratës së shërbimit me operatorin ekonomik fitues të kësaj procedure prokurimi.”.

- Si dhe bërë me dije përmes shkresave të përcjella në ERE nga ana e FTL sh.a., nr. 320/7 prot., datë 28.5.2021 dhe nr. 1829/1 prot., datë 21.6.2021, si dhe nga informacioni mbi monitorimin e realizuar në shoqërinë FTL sh.a. nr. 96/3 prot., datë 24.4.2021, rezulton se shoqëria FTL sh.a. ka bërë me dije se, për shkak të mospërmbylljes së detyrimeve kontraktore nga ofruesi i shërbimit, kontrata për realizimin e platformës IT, me qëllim shitjen e tepricave të energjisë elektrike të prodhuesve me përparësi nga FTL sh.a., është ndërprerë më datë 20.4.2021. Ndërkohë, shoqëria FTL sh.a. ka marrë masat respektive në zbatim të legjislacionit për prokurimin publik.

- FTL sh.a. ka vijuar të ndërmarrë hapa për procesin e realizimit të ndryshimit/zhvillimit të nevojshëm në platformën IT *online* të blerjes së energjisë, me qëllim përdorimin e saj edhe për procedurat e shitjes së tepricave të energjisë elektrike nga prodhuesit me përparësi.

- ERE vlerëson se shtyrja e datës së hyrjes në fuqi të “Rregullores për procedurat e shitjes së tepricave të energjisë elektrike në tregun e parregulluar për shoqërinë publike të furnizimit”, deri më 15 shtator 2021, do të krijojë mundësinë që shoqëria FTL sh.a. të realizojë punimet përkatëse dhe të kryejë të gjitha ndryshimet e nevojshme në platformën IT *online* të blerjes së energjisë elektrike, me qëllim përdorimin e kësaj platforme edhe në procedurat e shitjes së tepricave të energjisë elektrike në tregun e parregulluar. Tepricat e energjisë elektrike, të cilat do të tregtohen nga FTL sh.a., janë të përcaktuara në VKM-në nr. 244, datë 30.3.2016, të ndryshuar.

Për gjithë sa më sipër, Bordi i ERE-s

#### VENDOSI:

1. Pranimin e kërkesës për shtyrjen e datës së hyrjes në fuqi të “Rregullores për procedurat e shitjes së tepricave të energjisë elektrike në tregun e parregulluar për shoqërinë publike të furnizimit”, miratuar me vendimin e Bordit të ERE-s nr. 202, datë 2.12.2020.

2. Afati i hyrjes në fuqi të “Rregullores për procedurat e shitjes së tepricave të energjisë elektrike në tregun e parregulluar për shoqërinë publike të furnizimit”, miratuar me vendimin e Bordit të ERE-s nr. 202, datë 2.12.2020, shtyhet deri më 15 shtator 2021.

3. Për periudhën tranzitore, të përcaktuar në pikën 2, të këtij vendimi, FTL sh.a., për qëllim të procedurës së shitjes së tepricave të energjisë elektrike, të përdorë “Rregullat e përgjithshme të organizimit të aktivitetit tregtar nga Korporata Elektroenergetike Shqiptare sh.a.”, të miratuar me vendimin nr. 5233/1, datë 12.6.2019, të Asamblesë së Përgjithshme të Aksionarit.

4. FTL sh.a. të raportojë në ERE, çdo 30 ditë, për ecurinë e implementimit dhe përshtatjen e platformës IT.

5. FTL sh.a. të përgatisë strategjinë/metodologjinë për mënyrën e realizimit të shitjes së tepricave të prodhuara nga prodhuesit me përparësi të energjisë elektrike, siç përcaktuar në nenin 13, pika 1, të “Rregullores për procedurat e shitjes së tepricave të energjisë elektrike në tregun e parregulluar për shoqërinë publike të furnizimit në tregun e lirë, FTL sh.a.”, miratuar me vendimin e Bordit të ERE-s nr. 202, datë 2.12.2020, deri më 15 shtator 2021.

6. Drejtoria Juridike dhe e Zgjidhjes së Mosmarrëveshjeve të njoftojë shoqërinë FTL sh.a. dhe palët e interesit, të përfshira në dhënien e opinioneve për draftin e “Rregullores për procedurat e shitjes së tepricave të energjisë elektrike në tregun e parregulluar për shoqërinë publike të furnizimit”, “Shoqata Shqiptare e Furnizuesve të Energjisë Elektrike (AAES)”, për vendimin e Bordit të ERE-s.

Ky vendim hyn në fuqi pas botimit në Fletoren Zyrtare.

Për këtë vendim mund të kërkohet rishikim në ERE brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare

Ky vendim botohet në Fletoren Zyrtare.

KRYETAR  
**Petrit Ahmeti**